

四庫全書

集部

欽定四庫全書

集部
庸菴集卷一至
三

詳校官中書臣孫衡

中書臣劉源溥覆勘

謄錄監生臣溫廷鑑

欽定四庫全書

集部五

提要

庸菴集十四卷

別集類四元

臣等謹案庸菴集十四卷元宋禧撰禧初名元禧後改名禧字元逸庸菴其號也餘姚人元至正庚寅中浙江鄉試補繁昌教諭尋棄歸洪武初召修元史所撰外國傳自高麗以下悉出其手書成不受職乞還山復與桂彥

良同徵主考福建故明史列之文苑中附見
趙壘傳末然集中題桐江釣隱圖有云黃冠
漫憶賀知章老病憐予簡書趣又寄宋景濂
云當時十八士去留各有緣而戴良贈以詩
亦有麥秀歌殘已白頭逢人猶自說東周之
句則亦沈夢麟趙汭之流非危素諸人比也
禧學問源出楊維禎維禎才力橫軼所作詩
歌以奇譎兀冪凌鏢一世效之者號為鐵體

而禧詩乃清和婉轉獨以自然為宗頗出入
香山劍南之間文亦詳贍明達而不詭於理
可謂善學柳下惠莫如魯男子矣黃虞稷千
頃堂書目載庸菴文集三十卷又庸菴集十
卷自明以來未有刊板故流播絕稀今浙江
所採進者乃其詩集即千頃堂書目所云十
卷之本而文集則已久佚惟永樂大典各韻
內詩文並載尚具梗槩以浙本相較其詩惟

多七言絕句四首詞一首其他轉不若浙本之詳備疑編錄之時多所刪汰其雜文每題之下各載年月檢勘皆至正間所作而入明乃無一篇當亦不免有所遺脫然世無傳本惟藉此以獲見一斑尤不可不亟為甄錄謹據浙本參互考証仍編詩集為十卷文集則別釐為四卷又從西湖志補詩二首餘姚志補文二首統題作庸菴集以備元末之一家焉乾隆

四十六年九月恭校上

總纂官

臣紀昀

陸錫熊

孫士毅

總校官

臣陸費

墀

費墀

欽定四庫全書

庸菴集卷一

元 宋禧 撰

五言古詩

遊宿恭書記林居

昨夜共宿野返宿河水湄翳翳夕陰下密葉覆參差山
鹿下飲水庭鳥來擇枝與子暫游止晤語契深期緇塵
冒遠道靜宇諧曠夷榻外風雨至秉燭為題詩明發復
纒纒竟日袷風隨絃誦滌旅悶子樂諒在斯驟暄變涼

候春服又所宜相視宇宙內委順尚何疑

四月廿八日即事一首貽胡斯原

晨飧止東院晚食留西居水濱坐啜茗柳下觀釣魚無
事乃為樂所得良有餘緬思征途者去去將何如

用韻酬友人

海隅足辟地所慰得安居時艱愧蔬食矧敢謳無魚往
來感故意倡酬絃誦餘言旋望城郭肆志將焉如

四月廿八日川上晚詠示胡斯原

落景在平野森木翳橫川清風度葉下行行水紋連光
影眩凡目游鱗躍青天靜叟晚食餘為憇高門前諸生
慰孤抱待客父兄賢湯茗與筆簡隨需相後先浮蹤良
可嘆所駐亦偶然我衰已皓首撫運還自憐勉哉後生
者無恃毛髮玄

桐湖八詠為王遜菴作

看雲樓

孤雲何處來相對纔咫尺隨風出山去青天忽無跡往

來固無心幽人候朝夕高樓為徘徊無使長相憶

蘭谷

中谷見芳草令人憶沅湘沅湘不可往極目烟塵黃獨醒一何苦佩服垂幽光懷人千載下楚越遠相望

桃花塢

東塢何所有藹藹桃千株花間掛錦服石上留酒壺
土不易得塵暗荆棘途無謂武陵遠即此堪隱居

梧桐岡

高岡生梧桐西舍足避暑白日變窈冥清陰落窻戶洗
硯金井泉觀文丹鳳羽翛然坐題詩涼葉過朝雨

菊徑

開徑延故人種菊娛晚節撫運掇其英天寒霜似雪彭
澤獨何心耿耿書歲月搖落感時邁孤芳慰人傑

芙蓉隄

澄澄山下水粲粲芙蓉隄翠幢雜絳節秋色分雲泥緩
步念脫屣獨立知扶藜豈望衮衣至可期鳬鳥來

乳泉

甘泉白勝乳飲之可延年老人慰饑渴嬰兒顏色鮮福
地天所秘食飲非偶然塵居就枯槁令人思乳泉

合澗橋

石梁在山邊雙澗此中含清流本同源白礫無污雜朝
暮度漁樵車塵不相接木客有時來山童掃黃葉

川上即事

婉婉雙白鵝晚涼浴河水野翁怯隱憂臨流書未已平

生懶學書老至隨筆耳鳥跡誰復觀月光在沙觜

八月廿六日遊梅川長慶寺有感

古寺歷塵劫空山見清秋木葉日夜落海氣東北浮滌
煩憇微跡望遠增隱憂行吟瓦礫間盛觀焉可求草露
豈常濕巖雲亦暫留轉思學仙者脫身事長游在在昌
自苦起滅同浮漚

送丕大基自天界寺歸佛隴

炎暑伏深院朝夕誰與娛緇素雖異路旅寓同一區我

來已衰朽子出復何如幽棲豈無所邈在東海隅竹色
翳几榻池中淨圖書中夜忽有念涼晨理迴車所向就
昭曠行矣勿躊躇

八月十三夜史局儒士醵飲天界寺西庭叙別
分韻得天字

秋寺積黃葉行見江月圓衆客感時邁史籍已成編迢
遞四方至同舍非偶然久集有分期念之還足憐醵飲
際良夕露坐望青天明發各有適羽鱗異天淵少壯宜

努力衰病得生旋酣詠在茲席靜言乃離筵耿耿亦何
為且就殘夜眠

題蘭川圖

君子川上居忘機對芳草芳草有嬌節日夕慰幽抱故
鄉別幾年洞庭風嫋嫋何人獨行吟秋來轉枯槁優游
萬壑間中夜思遠道勿復言令德遠道聊自保諒懷濂
溪翁生意齊物表逝者果無窮生者殊未了邂逅為哦
詩霜寒越山曉

還自龍河次韻酬趙德純

皓首戀丘壑征途嗟轉蓬
生還亦偶爾見念鄉里中周
旋荅衆施蹇步敢勗躬
童時未覺遠閱世忽成翁
常懷俟爾坦青佩游泮宮
禮樂在諸老遺澤沾羣蒙
與君桑梓契異彼萍水逢
往來慰衰暮感慨寧無同
願重古人約道義薰予衷

二月六日夜宿倪以道宅為題畫梅

春夜宿溪上看花屢吟哦
珠璣宛在眼其如粲者何
衰

朽不自輟秉燭寒青蘿冰雪融土脉星月垂澗阿別離
在明發於焉留短歌

七月廿七日以考藝至福建水口驛驛官姚惠
卿乃吾鄉人有沐浴飲食之留而四明桂同德
又先至半日以俟皆出望外喜而賦詩

老去畏行役病餘慮炎蒸陟降雲霧嶺奔趨風水程去
越影生桂入閩葉凋莫浴垢水口驛遡風山上亭顧慰
值鄉彥遲需謝文明衰朽樂疎散餘事非吾能

在閩省試院次韻主文旰江吳尚志述懷之作
妙化魚躍淵流光蛇赴壑出書洛川龜閱世遼海鶴文
運復有興儒行固無薄持衡宗楚材盍簪集閩郭霽予
素愚蒙老至焉有覺伴食愧羶腥還山憶藜藿

次韻廬陵王子讓秋夜試院有作

我日已去邁不見秋葉紅明月昨夜滿白露下梧桐殊
方瘴癘地文會逢數公按圖得騏驎一笑凡馬空人事
豈能必取舍歸蒼穹鳥啼庭前樹誰復知雌雄晤歌在

今夕聚散皆浮蹤歸途畏跋涉皓首嗟飛蓬

八月廿六日雨止遊鼓山靈源洞至天風海濤

亭賦詩一首

雲卧已三夕山行歡百靈西林日華赤南澗秋草青仙
佛宛如在笙磬誰與聽陟降循水曲窈窕度巖扃風濤
忽在目颯爽敞孤亭茗飲助幽賞世外便獨醒尚瞻紫
陽翰不隨霜露零聞見慨今昨思惟著儀刑遠來慰衰
朽竒覽遺昏冥但愧無聞者凡迹同浮萍

吳尚志蕭自省而下七人九日自三山驛飲罷
登烏石山分韻序別以五字十句為率得盡字
文飲從醉吟旅游資汲引升高力已疲覽勝歡未盡烏
石會何如龍山迹難泯視昔均有懷此別良不忍采菊
惜茲辰行當還舊隱

慈溪人求詩贈醫者章敬德

三年艾可得八載詩未成此事太迂濶吾憐東海生病
肺一年苦對酒甘獨醒誰能愈其疾酬德非常情良醫

有章子方寸冰雪清珠玉文字重羽毛金帛輕作詩以
為報藝苑尋簪纓遷延歲月久坐見兵甲寧今秋我為
客迢遞閩中行新冬始迴櫂心氣猶未平過門客難謝
茅屋雞犬鳴索詩如索租衰朽詎能勝賈島詩思拙得
句雙淚零百篇遇太白但用斗酒傾如何迫我甚兩耳
聞風聲老至疾易作采藥隔滄溟空言適為累浮生安
足憑章子倘念我妙訣全神形歲晚東海上有約當合
并

十月晦日與諸友過葉伯泰隱居

出門風日暄野趨慰徒步行行五里餘訪舊寂寞處隱
居隔青烟涉津向紅樹幽人不在家童子留客住為尋
主翁歸北里復東渡乃從南山還衣巾認中路匍匐趨
柴門歡喜見情素止渴得土酥充饑思薯蕷厚意愧吾
曹為饌雞黍具望外出陳醪房中藉賢婦遂令周孫徒
痛飲不欲去獨醒笑老夫徒自耿憂慮人生歡會難萬
事皆有數今春曾此游重來歲云暮白白潮入川青青

蔬在圃時序雖有移郊墟但如故平生麋鹿姿羶腥非
所慕裹飯倘同襟有懷即相顧

雨中寫懷奉寄朱伯言周宗性兼呈悅白雲

雨水足新歲綿延冬旱餘泥濘固可畏仍欣長園蔬嘉
賓過我語繾綣慰久疏自顧復有歉敝篋唯舊書一飲
不敢具隻雞耻言無病兒卧在床藥物勞猥圖微生乃
如此故知謂何如俛仰宇宙內草木向春蘓游詠豈無
所且復充所娛日出即暄暖緩步有乾途相期出東郭

寫心高士居

二月八日雨中有作

水南掩關坐春雨生晝寒一榻委文史沉吟苦無歡路
阻玄鳥至雲海何漫漫羣生有常運向背詎無端惟茲
窮巷士靜言聊自安生緣諒已定過憂徒永嘆

送周宗性上昌化教諭

睽違條九載過門兵革餘江郭尚如昔所向迎酒壺箠
仕云有所簪笏重文儒年稔飯自足春暄壇可無家室

久留滯去台甘在吳學舍近天目登車三日途念茲亦
吾慰晤對為躊躇苦乏旅囊贈微言詎非迂蒼蒼山上
栢濯濯水中蒲歲候有黃落物性豈無殊願言旣恒德
慎勿忘厥初

寄宋景濂先生三十韻

相處纔數月相違已三年人來即問訊矯首玉堂仙尺
書固邈邈寸心每懸懸孰謂金蘭契而如萍梗然憶昨
被殊渥草茅倏牽連平生坐環堵豈意乘官船修吏與

末役之才媿羣賢強述外國傳荒疎僅成篇賴有班馬
手筆削容巨編素餐竊恐懼衰疾頻纏綿小几聚藥裏
空床重艾烟旅邸命如綫仁人俱見憐同舍既足藉同
姓尤惓惓早晚辱安慰殘喘聊自延涼風送越柁而得
歸園田當時十八士去留各有緣中秋佛寺裡明月照
離筵後夜復叙別慘懣燈影前贈言諾教誨有暇寄江
邊縹帙已拜惠所獲尚未全去年搜寧叟往還情為傳
我亦落行邁南閩涉山川考藝非所任冒往誰舍旃知

已諒興閔疲，駕詎勝鞭鬚。髮日已短，貧病無由痊。策杖
山野間，靜曠庶相便。擊壤或歌詠，忘憂臨澗泉。緬懷青
雲彦，文會濫隨肩。作詩謝疇昔，一一莫能專。諸公倘垂
愛，契濶寧我愆。

秋熱嘆二首

秋序已云深，秋暑何太熾。衰朽心益煩，常望風雨至。風
雨杳無期，烈日徹厚地。白露夜未晞，窓壁貯炎氣。恨無
松桂林，移榻一假寐。老疾將焉違，輾轉發長喟。

其二

去歲度閩嶺暑途猶可禁行舟溪水驛解帶榕樹林宿
疾不復作亦足紓憂心今去閩嶺遠秋陽何爍金疫癘
起乘熱窮苦誰能任矯首望雲漢沉吟復沉吟

題牧溪所作阿羅漢圖

吾聞十八士隱見天台山石梁隔塵世路滑莓苔斑樹
色在彼岸飛鳥能往還山中何所樂食飲非人寰巖石
深復深衣冷雲霧間密葉足蕭爽靈獸無冥頑大海逼

孤絕高泉瀉幽閑冥心萬化表長往窮躋攀焉知有衰
朽畏壘常相關

小山陳氏清暉樓

層構謝鷺溷憑陵高曠間出日離東嶺歸雲度西山
山溪被光景林木霽容顏陽明淨可挹而無陰翳刪仙居
復誰好游子紆珮環朝躋足澄觀夕眺慰餘閒於焉釋
煩慮詎謂忘人寰萬化一冥合經心秋雁還

次韻朱雲巢遊鍾山有作

有事汗青暇羨君山水游吾獨阻衰疾素興徒綢繆霞
光日邊近樹色雲中幽覽勝屬青眼含情嗟白頭高懷
既兼得况歷人事周紬書金石富傾蓋簪纓稠俛仰慨
今古直筆伸故侯雄才固馳騁餘力殊未休嘯歌寥廓
際天風灑清秋先還我何乖後往君久留鬱鬱山氣佳
滔滔江水流新篇足諷咏使我生遠愁

壬子歲四月甲申夜紀夢

積雨暗長夜山行經險巇悲風撼林木崖谷敞參差遠

聞豺虎號鬼燐弄光輝十步九失足中心祇自持所適
既迢遞黽勉焉可為道傍見明燭抵宿依茅茨開戶念
生客而逢主翁慈煖湯趣妻子然薪為更衣艱難又奚
怨少息非所期雞鳴夜將旦熟寐百無知欣戚一以忘
何有安與危生死宇宙內曠懷亦如斯聊紀夢中事誰
當賡我詩

題雪浦待渡圖

吾邑王性常客居羅壁山中歲晏躡冰雪還

水北省親時中吳顧雲屋留其家為作雪浦
待渡圖以贈之予觀其圖有感于中賦古詩

一首

冉冉歲云晏蕭蕭林木疎積雪徧原隰山川今昔殊遠
眺既茫昧近矚迷舊途游子去家久思親賦歸與寧不
畏凜冽飛鳴有慈烏川廣不可越臨津為踟躕舟子隔
雲渚迴篙憐久需故廬在何許北里路非迂豈無澤中
鴈亦有冰下魚甘旨恒在念釣弋誠良圖生理何獨拙

往返攜琴書，俛仰宇宙內。
幽抱聊自舒，日出長夜後。
陽復沍寒餘，茲理諒無舛。
不樂復何如？

萬壑樹聲圖

層崖望不極，溪谷何巉巖。
秋風起天末，奔泉落空潭。
石林高下響，猿鶴韻相參。
幽人戀巖穴，寂寞居山南。
萬籟慰衰暮，忘憂非酒酣。
援琴寫蕭散，此樂吾所耽。

為徐性全題顧山人天際歸舟圖

佳期諒無失，歸近心反勞。
蕭蕭江樹冷，落落雲山高。
孤

舟來浩蕩所望非漁舫風水協龜卜秋來多濁醪

為方景常題顧雲屋蘭亭圖

崇山氣磅礴羣峯靜儀刑風泉馮霞嶠迢遞委幽亭溪
林何濯濯汀蘭亦青青良辰各有適列坐集簪纓胡獨
一時樂而遺千載名浮雲變晨暮山川久含靈撫運慨
幽獨寧忘今古情

題雲屋所贈高峯遠澗圖

今年壬子秋九月余與玉山逸人顧雲屋連

夜宿吾邑羅壁山中時近九日羅壁之顛有
所謂龍門足以適登高眺遠之興雲屋以余
未遊為歎明日將偕往先為作高峯遠澗圖
以贈及還予乃賦詩書其上云

高泉落雲中大澤露羣石霜降草木黃青松有顏色緬
思玉山期邂逅滄洲客登高贈畫圖賦詩宿羅壁

題畫

伊誰愛茲境而忘登涉勞一水天上遠雙松野中高峭

壁無樵徑深溪絕漁舫唯應學仙者麋鹿與遊遨

六月十日過極樂寺寫懷

紺園草樹綠清飈朝暮涼當暑出關闌憇此獨徜徉過
客適邂逅遨遊山水鄉晤語廣居下隱憂忽遺忘况復
霖雨餘市津來米航豐年足慰意撫運念平康樂土亦
何遠伊誰望西方

欽定四庫全書

庸菴集卷二

元 宋禧 撰

七言古詩

為浦江鄭仲涵題鳴鶴軒

客舍炎蒸汗如雨終日昏昏獨無語
白頭無復青雲心落月聞雞卧茅宇
仙華山下神仙居何人夜半長讀書
高天涼風落松桂鳴鶴在庭窻戶
虛學仙歸來幾人在尚想當時度遼海
人間父子喜團樂誰似清門今不改

我懷好音知幾秋一琴欲往山中遊
試覓康成書帶草看花何必到揚州

為宋顯彰題桐江釣隱圖

桐江釣絲長幾尋山高石出江水深
當時羊裘已無跡今人誰得千載心
吾宗之中有才傑家住桐江釣寒月
往年曾着從事衫已覺綠簑勝雨雪
開元相業不可期人生行藏端有時
戎馬驚心幸無恙沙鷗在眼俱忘機
今歲逢君鑑湖曲又復起身勞案牘
黃冠謾憶賀知章

老病憐予簡書趣子陵故鄉秋夢多歸舟還向鑑湖過
在君客舍看圖畫奈此雲山江水何

己酉冬還自龍河浦王漢章宅元夕宴集鐵字
韻詩

新年會飲元夕節秩秩賓筵日中設滿座烏巾異昔時
在眼華燈待明月江梅尚覺花惱人野老誰言心似鐵
當杯酣詠不成章歲晚孤吟客歸越

楊妃菊歌代人次柳宗岳韻

秋花顏色如春花過客看花停小車玉環一去不復返
游魂血污愁天涯當時昭陽第一人沉香亭北酣暮春
三郎眼眩傾國色惟聞芍藥疑太真金橋夜入嫦娥宮
丹桂當秋香露濃晚節黃花想如舊同時不羨芙蓉紅
何曾賞菊對妃子歌詞新進供奉李從來邪正莫相干
秋花羞與春花齒漁陽鼓響鐵騎嘶繁華一夜隨霜蹄
妖芳在眼恨如海清秋獨立風淒淒金錢態慰彭澤令
愛却中央顏色正頰顏只合屏荒畦舊族寧容雜三徑

誰於隱逸加醜名覆邦尤物安足稱白髮黃花鎮相得
故園擬作歸來亭

題三香圖短歌

湘臯仙人弄珠佩極浦更闌月華墜霜寒青鳥未傳書
誰染春衣寄天外生來同芳能幾何兄弟相思夢中會
人間愁殺紫荊花曾為田郎夜憔悴

庚戌秋在閩中為新安鄭居貞題練溪漁隱圖

澄江如練人如玉何年磯頭結茅屋垂竿已喜喚漁郎

脫屣豈須稱宦族秋風蕭條來遠天沙際蘆花吹白綿
釣月不愁中夜冷繫舟可傍西巖眠遠憶當年子真叟
手把一犁耕谷口只今孫子謝簪纓千載相知寸心否
會稽野老遊南州子亦去家成久留畫圖在眼為歌詠
思鄉共立三山頭

自閩省還至建寧作短歌行贈別胡彥功

三山半月鎖秋院與子相聞始相見綉衣使者重斯文
白面書生作良掾深堂四更官燭紅簾前白露零青空

何人三夜見題目繩纏先歸青眼中知子胸中富經史
安定先生好孫子十載浮沉江海間憲府揚才遇知己
野客辭閩歸會稽重陽已過風淒淒建寧城下復為別
落日吟詩溪水西

為王漢章題王山農畫梅

山陰狂客王山農平生游戲梅花中梅花解作忘機友
雪天月夜長相逢腰圍固有食肉相忍餓惟知罵卿相
清癯仙質愛梅花寫神迥出縑塵上湯楊墨跡世上傳

山農與之爭後先只今片紙不易得豪家豈惜黃金錢
推蓬之圖為誰作爛熳千花競交錯逸興可發文章家
走筆花前風雨落我昔避地留梅川梅川孤舟花底眠
冰霜滿眼畫無路桃源誰送漁郎船王家高堂對圖畫
白首忘愁了諸債南風灑灑吹寒花往事令人感時邁

米烟山長歌寄贈新昌周銘德

米烟山者越之新昌之名山也隱者周銘德
居其上上有良田美圃綿亘三十餘里與平

陸無異地雖僻而有利及遠朔南醫家所用
白朮其產也銘德賢而好讀書以孝友稱于
鄉其友胡汝州史孟通為予道其為人又為
索予詩予以汝州輩之言足信而嘉銘德之
為人遂作采烟山長歌一首書以遺之異日
或一往游其山過剡見故人王公玉許時用
二先生寧不為我助屣屨之需乎歌曰

吾聞沃州天姥間又有采烟之高山山上之岡三十里

平視沃姥浮青鬟其中隱者吾所羨身世長與浮雲閑
種木可療九州疾種稻自給千家餐橘柑棗栗與桑柘
種者不少資者繁雞犬走巷陌鹿豕游林園官府無事
日人家總平安乃知桃源在茲土淵明所記欲往難周
郎一何樂居此勝居官晝則治家事夜則經史觀其人
天性孝且友與弟同財慈母歡擇交朋友重高誼急難
可託輸肺肝我恨不一見今秋過江干胡史二生喜告
我世有斯人為長嘆北閣高樓送吾目采烟遠在青雲

端嗟我老病畏塵俗剡中乘興逢時艱故人倘見招舟楫寧
吾慳丹楓葉冷風嫋嫋清溪水落灘漫漫此時過門見
王許青鞋從此躋巖巒作歌訂約在秋晚豈待娥江風
雪寒

八月廿五夜宿鳳亭夏叔方遺安室聽王時敏
鼓琴夜分不寐叔方求詩題其素壁為書短歌
一首

夕陽之東秋水西梧桐不見葉萋萋誰憐今夜鳳亭客

一曲琴彈烏夜啼
洞門白雪照燈影
阿閣清時看鳳棲
古往今來足相憶
綵筆好將桐葉題

春夜曲

銀塘竒峯疊羣玉
柳色暗連流水綠
十二仙橋半月光
翠閣青鸞鳴紫竹
詞客酒污宮錦袍
題詩畫屏照蘭膏
紅袖當筵罷歌舞
鳳唼泉乾春筍勞
酣吟為繫珊瑚樹
烏啼西牆未歸去
衆賓別院引明燭
墮翠遺珠百花路
暖雲氣密鴛鴦衾
不惜千金惜寸陰
夢中寒雪侵天冷

窗外楊花滿地深

題雲屋山人大松圖歌

吾聞丹山松一株盤根錯節鐵不如萬牛相送美材盡
獨以偃蹇留仙都松根燒丹學仙者仙成已去千載餘
夜夜丹光到今出泰山徒誇秦大夫誰能畫此古松樹
中吳高士身姓顧張燈驚起潭底龍揮毫墮落月中兔
聲名世重定無虛人物天生真有數精靈邂逅宇宙間
唯有造化知其故我夢羽人在丹臺飄飄綠髮春風回

半年高士不相見招我看畫山中來古松在眼為再拜
重是抑塞之奇材一時作歌強衰朽千古少陵安在哉

題顧山人秋江疊嶂圖歌

顧侯避俗留越山高情長在山水間秋堂夜半夢巴蜀
孤帆遠逐西風還椎床呼燈怪遲緩萬里江山猶在眼
澄澄素練天際長疊疊青鬟日邊遠寫來巫峽令人愁
神女陽臺居上頭尚見雲陰含過雨可憐樹色送行舟
地形何處接吳楚林薄人烟帶洲渚黃帽西來打鼓郎

茜裙東去唱歌女畫圖不盡意有餘太平人物俱歡娛
多愁宋玉在何許好賦顧侯山水圖

題顧侯江山圖歌

岷峨之山昔所聞下臨江水高入雲層巒奔流到東海
乃有巴蜀吳楚分暮年今見畫圖好滿目江山驚野老
峨眉新月遠關情巫峽朝雲愁未了客舟幾日下瞿塘
誰倚高樓望漢陽人烟晚集磯頭樹天邊秋水去茫茫
忽憶蘓翁遊赤壁西望蜀山歸未得當時謫官尚逍遙

月下吹簫從二客顧侯留滯東海頭放懷思上洞庭舟
龍門連月坐風雨畫圖一洗今古愁

為方處士題顧山人所作鑑湖漁隱圖

東南山水會稽好鑑湖一曲歸賀老狂客幽人樂未央
酒船釣艇愁可掃玄英先生懶作官好與嚴陵寫懷抱
垂竿竟入鑑湖中着鞭不上長安道古來謾說勾踐都
越女色白天下無千巖萬壑有清氣相看未必如老漁
適志生涯萬金藐忘機身世片舟虛功成頗怪鷗夷子

却載西施浮五湖

題顧山人畫古松歌

能畫古松天下少昔有畢韋今顧老顧老作畫書法同或
變真書作行草硬黃古紙一丈餘落筆古松隨一掃糾纏
黑白成文章恍惚陰陽割昏曉半年作客羅壁山但畫
江山極幽渺亂葉點點晉書圓直樹行行秦篆小有人
請畫松一株草書張顛合驚倒一株兩株八九株變怪
無窮出天造愧我題詩勞寸心數日一篇方脫藁何如

顧老畫古松游戲草書書法好

題李唐牧牛圖

金華柳待制天台柯博士為吾餘姚前貳守
鐵侯題李唐郊原曉牧圖已三十餘年矣此
圖今為吾邑陳生克和所得癸丑歲二月望
後大雪始霽予過克和家見此圖適有所感
因題七言古詩一首

冥濛烟雨郊原曉草色入天青未了柳林獨倚簑笠翁

眼底三牛無大小三牛那得如五馬馬在亨衢牛在野
故鄉長見牧牛人遠道空懷乘馬者江城二月雪滿空
縣令騎驢纔勸農我過城南見牛畫李唐筆跡稱柯公
柯公奎章監書日朝野歡娛耽紙筆當時名重柳先生
典雅文章非勝質二老南還鬢已華題詩看畫鐵侯家
應憐牛放桃林野尚憶鶯啼紫禁花古畫今人兩難遇
今人已與古人去三公翰墨共流傳富貴真如草頭露
可喜陳生得此圖重是三絕今已無耕田讀書有餘樂

更為子孫多買書

呂山人養父歌

新昌世家呂山人德升隱居授徒樂于養父
而克遂其志余聞而喜之為賦短歌一首授
史孟通為德升贈胡汝州周銘德皆德升友
余為作歌者蓋有信于二友也

剡中呂翁能養父父今行年九十五朝朝尚啖肉一斤
遠勝張公飲人乳呂翁愛日心何如一喜一懼膽桑榆

但願親如廣成子沃洲住似崆峒居我與呂翁齒相若
每憶高堂淚空落人生由來命不同短歌徒為呂翁作

孤雲曲為韋惟善作

孤雲度江江北來江南二月百花開錦衣笑看綵衣舞
憶昔關心烏夜啼烏夜啼不肯棲五更遶樹飛千迴有
兒頭白早來棲鳳凰臺仙家寶樹紅果熟口銜丹砂凌劫
灰劫灰已冷甘雨來孤雲高出楊花泥

義猫歌

故無為太守太原白公李清官浙東宣閫時
家有二猫同時而乳凡生五子而居之各以
所未幾其生三子者以已子就彼所并乳其
二子其生二子者又復彼三子于其所而以
已子就之于是五穉猫之育同一所而乳于
二母無親疏彼吾之間嘻異哉君子謂白氏
世積其善之祥也予聞其事乃為作義猫歌

曰

猫而人二猫育子無疏親非知勉強其情真人而猫骨肉相殘家難交其面非若猫有毛中州白家積仁義猫有人心感和氣北平猫載昌黎文人而無稱良可愧良可愧負天地彼猫為獸非我類人胡弗如甘自棄

挂劍臺行

泗水日夜流千古流不休誰為挂劍臺名聲聞九州九州行人泗水過北來南去瞻嵯峨乃知挂劍一時事劍與古人名不磨古人重知己九鼎何足比况是三尺鐵

肯背生與死徐君愛劍口無語季子心中業相許生死
知心上國回劍挂墳前淚如雨墳前今有臺季子不復
來當時寶劍安在哉無乃一夜隨風雷君不聞歌風臺
上赤帝子寶劍龍吟哭蛇鬼神物變化從何來整頓乾
坤須仗爾嗚呼神物去就上天所使隱見不常獲者有
幾吾知寶劍勲業多季子徐君焉得而有此沛縣臺高
風大起風起雲飛連泗水守四方得猛士臺兮臺兮可
徒挂劍而已矣

欽定四庫全書

庸菴集卷三

元 宋禧 撰

五言律詩

胡氏斗室

一室從渠小能容何限人孰知江海客不恠往來頻紫
竹長年好黃花臘月新我來時一飯避地作東隣

胡氏一鶴亭

一鶴歸何晚人間事已非野亭留獨立海月照孤飛落

落新黃葉蕭蕭舊縞衣主人鷗夢遠對汝亦忘機

贈岑敬先

不見岑徵士驚心忽二年三山新歲到一棹舊情牽
執紼哀吾母通家見汝賢相過不相遇邂逅在梅川

贈徐生

下榻東軒夜看花北海春愁來驚歲月老去厭風塵
邂逅論文地留連避世人眼明衿佩合燈下肯相親

歸雁

歸雁離南海翩翩向北飛青春愁送目白髮淚沾衣萬里渠能往孤雲夢已違關山今夜月應為照清輝

送友人

老去復相見別來今幾年窮鄉君再到多病我堪憐渡水山雲薄當樓海月圓客邊愁送客頭白聽啼鵲

送謝用敬

白髮梅川客梅天看種田故人能再見往事勝相傳海氣樓臺盡山輝玉石全秋來還有約雞黍願豐年

徐氏瞻綠軒

綠竹似君子長年不厭看
沉吟風雨夜牢落雪霜寒
開徑連書屋臨流足釣竿
眼中高節在早晚候平安

水竹軒

水竹都堪愛幽居二美兼
曉光浮釣艇秋色暗書簾
已有江湖興寧無雨露霑
我來聞好語酒量為渠添

送天界寺書記聯李芳歸四明省母

四明三佛地一出幾番歸
母在頻回首秋來遠寄衣
燈

前黃葉落舍上白雲飛愁極成歡喜禪心即此機

送景德輝

水汎春江綠山圍曉郭青登高花黯黯送遠雁冥冥禮
樂興周室賢良滿漢庭從來多際會念子久窮經

蘭室

幽人種芳草宛在書室前天香熏夕寢琴曲入春絃耿
耿同心友飄飄遺世賢相逢曾解珮山澤往來便

竹深軒

曲徑畫陰合虛窓寒色交琴清風動葉衣潤露垂梢徑
造不須問遠謀能解嘲相過待春晚留客筍供庖

王生允承以其畫像求詩像畫古冠服手執書
卷有抱琴者從其後于古槐之下游息焉蓋其
家有軒扁曰嘉樹云

陰陰嘉樹下有此稱家兒冠服超流俗琴書樂盛時趨
庭應有訓出戶政多岐念爾槐根立清晨有所思

為楊灌園題鄭山輝天涯芳草圖

春草生長坂幽人竟不知參差添翠羽蕭散長青絲西
日高低照東風晝夜吹畫圖非鄭老遠道望渠思

為徐自牧題李侯墨竹

瀟灑金閨彥分明玉箸書天機元不淺繪事未應踈持
節風霜際含香雨露初江南相別後清興更何如

七月廿五日題崇安驛壁

到得崇安驛初聞打鼓聲白衣知不悔烏帽出相迎考
藝思前輩明經愧後生往還愁遠道老病重關情

八月二日留題靈山庵靈山去福建省治十五里

江郭待期入雲山連夕留星明俄近斗露下不知秋迢遞逢僧語虛空忘客愁勞生真似夢暮景願回頭

還自閩中過鵝湖寺

落日過鵝湖青山塔影孤當時論道處今我憶先儒舊寺烟霞窟荒祠草木墟躊躇多古意僕馬趣前途

冬至前一日宿永樂寺水竹居次鄭山輝吳主

一壁間倡和韵

寒過冰上客陽復地中雷宇宙兵車靜山林佛寺開舊
交多死去久別始重來知己三更語傾心一宿迴

懷紀大璞

二月朔過廣濟寺觀上虞士人送傳本真徽
正音游學杭之普福詩卷有懷大璞講主且
喜傳徽二子已還舊隱乃題詩卷末

聞說芝山老虛名只累身城居長借榻官事苦勞人二

妙陪寒夜孤舟別早春歸來詩卷好江海尚緇塵

題釋交卷

天台朱伯言當吳越道梗時挈家由海道抵
上虞而居既而遭母夫人之喪時同郡周宗
性為稅官五夫為助治喪事殊有力焉伯言
感其誼著釋交一通以遺之今予見其卷乃
題五字八句

兩賢交有道同郡又同心度海秋風急聯床夜雪深親

喪埋旅櫬家難助
簾金高誼稱詞伯
雄文動士林

次毛進仁留題張氏書舍韻

步屨幽居近論文
畏友稀春郊風落帽
晚渡水沾衣對榻
良宵坐題詩逸興飛
雨聲生客悶帆影待潮歸

留題張德言書舍

連日勤相過寧知曲逕迂
雨中春剪韭飯後夜投壺
巾屨緇塵外琴書碧海隅
竹林逢二阮古意慰狂夫

過東山寺航毒海房留題

金匱要略卷三
湖曲藏深院山空出遠鐘森森春砌笋肅肅晚衙蜂僧
老看孤榻兵餘憶舊松自憐花竹畔獨畏酒杯濃

秋懷十首

枕上憐衰朽江邊遣寂寥綠楊臨水立黃葉帶風飄扇
去清秋雨帆回落景潮涼襟何日遂愁思暫時消

其二

往事隨塵夢新愁對物華暮年身少藥秋暑眼添花剝
落風前棗荒涼雨後瓜相逢皆此况慰意野人家

其三

秋半江城裏砧聲夜不聞衣裳雖未換機杼豈無分暑
枕留冰簟寒閨惜布裙蕭蕭桑葉畔誰與倚斜曛

其四

閒暇多高誼艱難有俗情水深魚始樂林盡鳥須驚避
逅非吾事盈虛任此生已知齊物我漸覺一身輕

其五

秋熱愁無雨秋涼雨復愁衣單驚夜半屋漏聽床頭且

得山家樂還看地利收吾生聊自遣有計補冬裘

其六

海角思相贈濠梁阻數陪十年袍可補千里客難迴范

叔寒如舊王郎醉必哀高秋頻送目鴻雁幾時來

原註時王

避庵留
淮右

其七

舟楫何增價衰翁訪舊難只嫌前路遠轉失向時歡酒

滿金波甕瓜寒玉露盤梅川胡老子秋夜幾相看

原註
予留

梅川時胡白
石待予甚篤

其八

憐才心獨苦恨別淚頻流又報吹笙客將為跨鶴遊鳴

琴山水夜下榻竹梧秋頭白貪來往誰能為我留

原註
吹笙

客指王
時敏

其九

燭湖秋雨過山閣定清涼髮為高僧白塵兼落照黃老

懷同閱世空境更聯床有約酬花月良宵意不忘

原註
高僧

白雲
翁也

其十

晚歲情偏切英才遇亦稀豈知麟在野翻使淚沾衣東

閣朝相候南塘晚共歸傳經今已矣此事與心違

原註此詩

為梅川胡
生斯厚作

自題葉氏隱居壁上墨戲

桃竹秋生筍藤蘿早著花暄涼驚物候老壯惜年華重

過招賢里遲留處士家月明貪坐石天近欲乘槎

次韻徐性全同宿小山陳氏書樓有作

出郭天猶暖登山興獨深
雨餘初衣褐秋盡未聞砧
黃葉經過處青燈故舊心
客樓頻對榻倡和有清吟

三山王叔婉世善堂

舊識王徵士今登世善堂
青氈多過客白首未為郎
作堰三山近修隄百里長
傳家有遺澤鄉井豈能忘

贈應生自脩

憶汝童蒙日從親邑郭
時七年今已過萬卷早相期
世

變省渠長河清嘆我衰功名歸少壯辛苦勸男兒

次韻涓先生六月十六日宴集鄉校東齋有作

汗流聊解帶心定復垂紳蕭爽論文地淹留避暑人杖
攜桃竹舊衣製芟荷新共愛山翁醉相過作近鄰

鄭氏竹亭

空山喬木畔種竹傍溪亭水落霜初白人來眼共青也
知棲獨鶴猶憶度流螢涼處誰相過題詩酒半醒

為玉生題東軒

早起東軒坐晨光海上來乾坤誰久住日月底相催梅
熟從今喫松高自昔栽後生須有用書卷及時開

輝谷上人東軒

東軒何所有日出見光輝客去仍懸榻鐘鳴早著衣市
聲聞下界山色悟初機時有看雲叟朝來暮不歸

正月廿八日偕白雲長老過葉伯泰隱居

浦遠春潮急風高晚渡遲同來非舊伴一宿似前時雨
對高僧飯花題病叟詩新年行樂少重過荅幽期

五言排律

三月廿三夜與張與權宿建初寺燭下為賦生

意垣十四韻

同宿城南寺吟詩過夜分為誰揮我筆念爾好斯文靜
裏含生意垣中謝俗氛當堦春草長入戶妙香聞清液
看朝露微酣倚夕曛豈知愁似海但覺氣成雲濂洛堪
傳業岐黃可策勲天心常惻隱世事謾紛紜孰契鳶魚
妙難同虎豹羣窮陰陽始復殘夜日將昕至理從誰究

深衷為汝云張燈破昏黑得句慰慙懃屢聽城頭鼓長
延鼎內薰一時留勝事明發報嚴君

贈魏松岡俞復嬰二道士十韻

予以庚戌秋九月廿四日自閩省還至崇安
武夷宮魏鍊師松岡率紫清庵俞逸人復嬰
以小舟偕予與四明桂徵士同德等數客遊
九曲以水淺中道而還是日予與同德出溪
口上驛舟向浙水東而歸舟中賦十韻以別

魏俞二師云

武夷山水窟自古集羣仙半世看圖畫三秋入洞天情
親雙羽士勝引一漁船飯罷攜茶具經存及草玄雲巖
風颯颯石瀨水濺濺九曲何如好中途不得前紫陽餘
舊跡清氣望先賢世變仍奇觀吾衰已暮年分袂閩嶺
下歸櫂浙江邊何日重相見神交諒有緣

送承漢德復往濠梁兼寄王遜庵十四韻

久客多親舊殊方似故鄉南還經鑑曲北上到濠梁賀


老黃冠好莊生清夢長未須論往事且復惜流光
治圃甘辛苦思家付渺茫果蔬資雨露萍梗歷星霜
脫屣神仙宅揮毫翰墨場浮生雖浩蕩勝地足徜徉
為問吹笙客何當過草堂寄來承解珮別去憶聯床
幾見桐花落又驚梅雨涼湖山長有待淮海尚相忘
託子傳心素懷人覺鬢蒼詩成兼送遠離思滿斜陽

挽汪太守二十韻

五馬人生貴三衢歲貢奇賢能真間有名節固無虧
伏

枕吾鄉日憂天故國時病來辭藥裏死去了心期既覺
黃梁夢難求白壁疵漢庭曾有策周室豈無詩誰憶天
人對空懷黍稷悲殺身多進士報主足為師同輩公無
愧純臣世不疑當書班固筆已撰蔡邕碑舊治三遺愛
凡民百爾思桐鄉知負土蒿里望歸旗有子恩情切逢
人涕泗垂孝思難奪志哀挽謾修辭山郭迎棺久江船
上瀨遲秋風鳴驛樹朝露泣園葵華表今聞鶴佳城舊
卜龜幽明俱已盡魂魄更何之神道停飛蓋仙遊看奕

棋洞天雖可樂官舍肯相遺





欽定四庫全書

集部
庸菴集卷六
四至

詳校官中書臣孫衡

中書臣劉源溥覆勘

謄錄監生臣溫廷鑑

謄錄監生臣朱起鳳

欽定四庫全書

庸菴集卷四

元 宋禧 撰

七言律詩

冬夜書懷

海邊積雨客愁長
底事高樓有月光
酒醒只疑天欲旦
烏啼猶苦夜多霜
遣懷詩賦添華髮
在眼山林缺草堂
欲問君平無覓處
暮年人事付茫茫

望雪

荒邛臘月十三日雨後出門泥半乾欲雪未雪雲葉亂
似暮非暮風華寒敝裘在篋一冬暖遺蝗入地千尺難
今夜不知多少雪閉門忍凍有表安

胡氏連理榆

兩株榆樹隔河生長對君家好弟兄連理可成嘉樹傳
同居真得古人情今看胡氏書青簡轉使田郎惜紫荊
歲晚鄰家誰煮豆眼中祥瑞最分明

胡氏養志堂

兄弟同心四五人相看慈母白頭新
長垂涕淚艱難際不棄詩書寂寞濱
父沒已隨嘉樹朽歲寒今見故園春
我來聽說君家事喜有諸郎慰老親

衛公鶴題畫

衛公好鶴鶴乘軒玉露金風灑羽翰
鶴壽可期千歲永君恩曾使萬人看
縞衣忽與緇塵暗清夢空留白雪寒
松下仙翁能跨汝瑤臺一望月團團

胡達道觀錦軒

胡家錦雞何處來小軒花下為渠開日中錦綬自能吐
世上金刀誰解裁富貴還鄉同一夢虛無過眼已千迴
主人閱世今頭白鶴氅時時坐綠苔

岑氏聯桂東樓

君家雙桂上林中念爾長思兩伯翁諸老神遊明月夜
高樓影接廣寒宮殿前作賦知誰敵花下吟詩笑我窮
頭白羨君才力盛尚看玉兔立秋風

徐氏怡軒

人間兄弟幾家好伯仲壘荒自古希我向梅川行野色
君開竹戶接朝暉隔河雞犬春聲急繞屋田園豆葉肥
更喜諸郎秋共被吟詩酌酒為忘歸

重過烏山即事

冬晴重過烏山寺年老今非白面郎石髓汲來櫻葉井
塵軀浴罷菊花湯三生有約誰能記一醉無愁自不妨
酒醒出山空極目獨憐白髮對斜陽

眉山王氏雲林書舍

我愛雲林事事幽，況聞書屋住溪頭。
春天氣暖蛟龍雨，月夜陰涼翡翠樓。
作賦豈無攀桂客，卜鄰曾有種瓜侯。
夢中白髮空經過，何日溪邊泊釣舟。

送張士儀經歷

張侯不見十餘年，淮海歸來雪滿顛。
九歲兒郎能負米，半生客路未歸田。
寒宵燈燭西窗下，春日杯盤北海邊。
客邸相逢又相別，殘年多病重潸然。

元日書懷

未歸城郭避車塵且伴妻孥住海濱
臘月雨連元日雨故鄉人作客居人魯
連東海誰攜手甯戚南山自託身
只有愁心耿長夜已餘短褐對新春

宿陸氏山莊

故舊相招為放舟上林佳處得重遊
西家客過東家宿仲氏情同伯氏留
夜坐競歌三疊曲春歸只在五更頭
自憐白髮渾無寐銀燭分明照客愁

重過上林井亭感舊

二十年前向此過涼亭寒井慰奔波當時未覺青山好
此日重來白髮多投轄幾人懷往事煎茶何處聽清歌
路傍野老能迎客樹下幽居奈爾何

為楊仲容題柳莊

誰家柳莊溪水頭我來柳下維孤舟柳花如雪送春去
楊子種田看水流北窓陰涼足高卧東臯鄰近時一遊
門前種柳似彭澤世上有官愁未休

陸氏秀野軒

陸家軒子傍山開花竹當階手自栽對酒春衣看紫氣
奕碁夏簟坐青苔上林芳賞令人憶三徑幽尋有客來
底用雲間聽鶴唳沙鷗相近不相猜

楊氏萬竹樓

童子曾登萬竹樓題詩今作暮年遊老蒼不見諸君子
喪亂猶驚四月秋窓戶青雲通窈窕兒孫錦服繼風流
清溪流向樓前過能與笙簧洗客愁

楊氏聽水軒

金沙溪上小軒開靜夜泉聲為爾猜
仙子笙簫雲裏過詞人環珮月中來
紫烟目眩香爐頂白浪鳬驚灩澦堆
我愛幽人卧空谷釣天在耳夢初迴

四月十五日偕岑宗昭胡斯美及其從弟斯敏
游宿竹山精舍明日題詩于壁而還

龍潭橋西山谷中茅屋住者皆樵農
兵前送官大木盡春後斲筍高峯重
同行何人黑漆髮精舍有佛黃金容
三更月明五更雨子規來叫門前松

次韻王允昭遊源山中夜宿有感

餘春紅紫尚菲菲訪舊傷情故老稀秉燭山林連夜宿
思家道路幾人歸龐公采藥知何往杜老誅茅願豈違
他日幽居山谷裏與君開戶看雲飛

贈陸生

迴棹游源日已斜道逢二陸立晴沙借人几榻開漁舍
送客壺觴出酒家柘葉青連溪岸樹藤梢白覆竹籬花
連朝多謝慙慙意自念風塵兩鬢華

贈徐生

徐卿生子世積善杜老作歌稱絕竒麒麟千古同一夢
豚犬何人譏二兒橘花滿林定結實蚕蠶在箔終成絲
寸陰可惜綠陰下正是清和四月時

鳳山范氏碧梧軒

范家從來有賢母東漢流風東海邊孤兒當室鳳雛立
寡婦下帷梧葉連高岡日射文明地阿閣雲飛咫尺天
頭白無愁看玉樹舊書長在綠陰前

為黃克敏賦農隱

短褐力田山海間
春耕秋穫心自閑
飯牛身遠虎狼窟
狎鷗夢空鷓鴣班
且復殺雞留宿客
未須采藥入春山
荒茅夾徑草廬暗
鄰舍有誰相往還

題鄭山輝效高房山枯木竹石圖

山輝戲作房山畫
已亥經今恰十年
館閣當時文物盛
風塵何處畫圖傳
神交未覺龍蛇遠
羽化猶疑翡翠鮮
前輩風流歸鄭老
令人注目海雲邊

羅氏兩寡婦

梅川羅氏有兩寡婦皆姓朱氏一為姑一為婦也姑既失其夫有一子娶而生子甫三歲又蚤世其妻與姑氏皆守節力紡績以活備服艱苦其志弗回也予以辟兵寓其鄉其鄉人好義者往往為予道兩寡婦志節若此今過其家塾見孤子祥能讀書甚勤問其年已十五矣其祖母與其母又能力教之切切焉

冀其成人予聞其鄉人稱之又若此遂為賦
詩一首以塞其請云

阿姑阿婦在空帷每對冰霜涕淚垂底向一門同苦節
絕憐兩世看孤兒門前大石何曾轉山上喬松不可移
鄉里都稱雙節婦兒郎在眼為題詩

贈李光道

城郭歸來百事踈殘生猶問五行書故人有子能傳業
樂土何時許卜居青眼為開分別後白頭幸活戰爭餘

喜君跨竈翻垂淚感舊憐貧豈獨子

送趙仲容東遊

會稽趙仲容先生近以一病幾不救多難之餘不得坐以俟命將以繪事游山海間予念其艱難之際所向皆然姑以救一時之急焉耳間語及此為之悵然遂以詩送之先生見吾諸故人煩務其間有觀詩觀畫如疇昔者乎聊以先生之行卜之也

漂泊風塵嘆此公早年習畫畫堂中風流尚在時非舊
急難何多老更窮市駿莫憐曹霸馬作歌未遇杜陵翁
逢人不必論前日好與君平賣卜同

贈華松溪

往歲廬陵龍君子高常為予談浙水東有工
畫時人像者下筆點染輒逼真未常起草一
時同事者鮮出其右華君松溪其人也松溪
吾邑世家與予同黨而生常游江海間予高

稱之甚確予則未之識焉今年正月八日遇
諸邑郭鮑氏藥肆即欣然出楮筆為予寫衰
陋之相睥睨立就神骨顏色一市人見之無
不撫掌發笑以為予也予無以答其勤乃贈
詩一首

龍侯長說華山人世上寫真真絕倫下筆縑緗辭起草
驚人童穉巧傳神花前為洒烏巾雪兵後猶看白苧塵
十載相聞能一笑豈知邂逅在新春

題煮石山房

吾里鮑生思美既冠而有子矣氣質日益醇
每日即蚤起從其父處北市藥肆終日治生
事夜則歸其室讀孔孟書不倦吾聞而喜之
近自山野還邑郭以心疾費調遣常曳杖徐
步靜巷中一日值鮑生因過其所謂煮石山
房者壁上見一詩乃廬陵龍君子高所題也
吾又讀龍詩而喜之喜而技癢遂忘心疾之

苦亦為賦七字八句詩一首而律則有不能
協者矣生之東鄰有園數畝屋一區常有學
仙者居之今不知其何逝矣吾聞神于醫者
多仙人之流有能愈吾疾者往來其地吾將
假一夕之榻而與之宿乎生為我候之

鮑生賣藥江水北夜歸讀書江水南南山白石為誰煮
北海清尊留客酣仙家火候憶烹鼎人世天倫知盍簪
老我多憂得心疾月明借榻東家庵

清明日過張與權書樓既為題唐玄宗擊毬醉
歸圖餘興未已又賦五十六字

病翁日夜抱春愁喜值清明出郭遊唐帝擊毬看畫卷
張生留客坐書樓興衰可見千年事歡樂翻成四海憂
我為前修墮清淚諸孫能憶曲江不

新歲岑處士見訪

去年海角往來頻多謝高情洗客塵別後歲寒江竹老
愁中春暖野花新西樓為下青燈榻南郭能尋白髮巾

金人四庫全書
卷四
江水雲山猶在眼何時耕釣得相親

七月廿七日在天界寺送炯用明還永樂寺

秋懷叙別立高臺晚色金銀佛寺開家問已勞三月望
舟行先向大江回故鄉苦樂令人憶甘露登臨待客來
白髮滿頭今更短東歸山水定徘徊

送天台葉夷仲之官高唐

路遶天台萬疊山當年有志出鄉關黃河北渡之官去
白象南來奉使還際會風雲初發跡憑陵瘴癘已開顏

中原一望多秋草為政知君未得閒

悼蓉峯處士

原註處士宋景濂先生父

處士年高太史宅仙華山墜少微星客車送柩過千兩
子業傳家重六經山氣猶疑風肅肅溪光長見水泠泠
從來同姓多傷感三誦哀章涕淚零

崔氏萬松山房

揚州城外松萬株誰葬此丘崔大夫生賢總是廊廟具
濟世豈同山澤癯秋榦巢雲來海鶴春花啄露集臺烏

當年讀禮關心處舉目難忘室一區

欽定四庫全書

庸菴集卷五

元 宋禧 撰

七言律詩

送諸道初該萬有歸寶林寺

天末二郎思舊隱山中一老望歸來
乾坤多被樓臺隔
昏曉長為鼓角催
月色清涼何處見
夢魂辛苦有時迴
還鄉又在中秋後
黃葉蕭蕭寶殿開

送人還高麗

奉使遠離山水國稱藩先入鳳凰都素聞箕子明皇極
更憶周家展地圖風舉天池鵬一息潮迴遼海鶴相呼
中華自古通殊域北往南來萬里途

贈紫芝山人

紫芝山人有青門種瓜之志而未得其所五
口之家無一夕之儲不知造物者將何處之
也今慕義而遊將以石刻集王右軍書墨本
售凡好事者予竊有感焉因賦此詩為山人

道噫時既艱矣歲既晏矣山人所嚮其有值
乎其無值乎雖然吾故人見吾紫芝而讀吾
詩其為前途之導者蓋不獨吾也紫芝其往
哉

有客有客王紫芝江空歲晚欲何依試看墨本打碑賣
勝謁朱門冒雪歸浙水文章依舊在晉賢字跡到今希
年饑有粟知相易不用山中更采薇

十二月廿五日送趙鳴玉以其所畫游南山

雪滿空山二尺深，可人獨步費幽尋。
政同沙漠飡糴厄，豈有山陰返棹心。
不惜衾裯換斗粟，誰言圖畫直千金。
南山親舊知吾意，除夜歸來聽好音。

贈術者胡桂堂

鄉閭見面不知姓，江海傳聲未識君。
百歲人生易相失，五行家學許誰聞。
天寒北郭初青眼，日落西山總白雲。
萬事忘言唯一笑，謝君點檢更云云。

送赫彥明

惜君遠去在新正貧病無緣叙別情臘雪已消三尺盡
春潮初送一舟行天涯有夢尋鄉曲海角何年聽珮聲
烏帽蕭蕭俱皓首萍流蹤跡歎浮生

留題葉氏隱居

正月廿三日偕王處士起東王山人紫芝出
城東門過葉君伯泰隱居及竹山渡先濟而
往者郭廷羽伯泰之隣會吾人同席而隱者
張子仁也過午而還賦詩一首以贈伯泰

生來兩過竹山渡早歲經今已暮年黃認橘林寒雪後
白知梅藥暖風前麻鞋屨約通家舊草閣幽居覺爾賢
作伴豈知江海客為誰激烈酒樽邊

喜柯氏復舊物為賦詩一首

天台柯君叔靜以童時喪其先公奎章閣博
士所遺圖書等物之最重者無以考世德瞻
親像驗家慶而恒以為大憾凡與親故語未
嘗不流涕而皇皇焉蓋叔靜自知人事即不

能釋于懷者有年矣山陰唐君彥常好義之士也于柯氏舊物之喪嘗得之以重直一旦見叔靜而閔其孝悉以向所得者歸柯氏不靳于是大夫士以詩文美叔靜之孝彥常之義者無愧辭焉予雖不敏而詩之為作固不得而辭也

奎章博士丹丘公輝赫聲名天歷中遺像還家兼舊物佳兒隔世識先翁趙人猶喜歸金壁魯史自書得大弓

好義今聞唐處士解憂孝子寸心同

二月三日過嫺戚倪氏深秀樓留宿賦詩一首
福地重來白髮踈仙標誰復好樓居驚心世事三年後
照眼梅花二月初解凍陽岡仍種橘生賢後代每收書
君家積德由來盛親戚相過喜有餘

為汪復初題四明溪舍

丹山赤水洞天中水出長溪似白虹簾外鶯聲春樹綠
潭邊鷗影晚花紅汪倫釀酒能留客李白題詩不負公

欲看丹經坐清夜為予下榻候仙翁

為倪道原題九老圖

何代傳來九老圖清平文物定何如
水中亭館晴移棹樹下衣冠晝讀書
閱世長於佳處住論交不與少年居
可憐奔走風塵客田舍歸來白髮疎

倪安道一樂堂

高堂並坐白頭親兄弟相看樂意真
對酒雲溪金奏響過庭華月錦衣新
兵前骨肉誰無恙屋外田園況不貧

家慶從來最慳得願將愛日荅洪鈞

倪煥章藏翠軒

長松高竹覆春陰小院開簾翡翠深
逕轉賀溪知幾曲枝巢越鳥見層林
清狂未羨黃冠好少壯無愁白髮侵
勲業關心書萬卷酒船何用客相尋

留題上虞陳處士皆山樓

老來厭住城郭中眼暗車塵千丈紅
十日看山坐西閣半春多雨怕東風
榻移更覺陳蕃好賦就那知宋玉工

夜對青蓮須秉燭明朝有約遍溪東

再題皆山樓

高樓百尺坐元龍客到山間度幾重雲薄霏霏含翡翠
窗虛面面見芙蓉空中書寄仙人鶴月下詩成佛寺鐘

三十六峯都在眼登臨更憶最高峯

原註皆山樓去丹山赤水洞天十五

里劉樊昇仙之蹤尚存樓之東一里許有山若屏障列其牖前山之外有所謂東明寺在其下風清月朗往往聞其鐘磬之音登是樓者恍惚若與仙佛接故詩中及之

二月十六日過楊氏嘉樹軒訪三山岑宗昭

嘉樹軒中久不來新年窗戶為誰開生還再見三山客
老去同觀二月梅天際相思曾聽雨花前一笑為銜杯
清江難覓漁郎棹醉後愁吟坐石苔

過亡友楊昭度宅見其諸子復習舊業悲喜交
集為賦詩一首

楊子宅前春草新老夫一過一沾巾城東聞笛經三載
江上垂竿復幾人當室兒郎愁獨立通家子弟喜相親
新年又聽書聲好竹徑幽尋莫厭頻

為楊生簡兄弟題嘉樹軒

軒前嘉樹為誰栽南國曾移此樹來孝子懷金寒果熟
德人比玉暖花開侵凌冰雪寧無難粲爛文章定有才
愛汝諸郎對書冊東家桃李自尊罍

題鄭山輝畫蘭

醉眠居士何憔悴託意秋蘭似獨醒身後流芳頭已白
人間看畫眼俱青湘靈夢寐同紉佩楚語愁吟可續經
誰解烹茶留此老吳興文物久凋零

為王漢章題鄭山輝李石樓合作蘭竹圖

冀北李侯多晚興、江南鄭老有春愁、風潭對影來溪曲、雲谷聞香坐石頭、會合可稱雙壁在、畫圖將見萬金收、清華自古歸王謝、所愛曾兼二美不

為老圃生題錢舜舉畫瓜

官路歸來兩鬢華、誰知老圃樂生涯、種瓜不作封侯想、攀桂猶稱進士家、一卷畫圖兵後物、百年世事眼中花、炎天客過三山下、豈厭煎茶與設瓜

三月一日再過楊氏嘉樹軒與岑宗昭王起東
楊生宗權對酒既用前韵再賦

半月春風兩度來楊家兄弟酒尊開西軒已為吟嘉樹
東閣那堪見落梅此去綠陰還在眼寧貪清晝更傳杯
吾曹相過多深意門徑無令長綠苔

為聞人生題鄭先生李太守合作蘭竹圖

石樓寫竹有書法山輝作蘭非畫師絕憐一老衰遲日
虛憶諸公全盛時澤國淒涼今見此玉堂文采舊稱誰

流傳後代應難得肯與聞人玉雪兒

三月十六日會蘓伊舉于楊氏嘉樹軒辱示見
寄詩一首次韵酬之

老病生還九死餘杖藜寧嘆出無車五年不見先生面
三徑相逢處士居芳草綠陰還自好落花紅雨已成虛
白頭會合知誰健見說燈前尚著書

過建初奉上人房

城南僧舍我頻過塵世閒情奈爾何雨後畫圖修竹潤

春深窗戶落花多
齋庖燒筍留人餽
醉筆題詩倩客歌
緩步幽尋知幾度
虛期杖履入烟蘿

周信原南溪草堂

南市津頭春水生
南溪一里上流清
堂前日夜生芳草
海角平安過大兵
先世圖書猶在眼
故鄉山水更關情
出門舟楫元非遠
問柳尋花及晚晴

周氏木香亭

城南周氏木香亭
人倚欄杆眼為青
照夜白華春澹澹

生涼綠葉晝冥冥月明不怕緇塵暗露重能令宿酒醒
誰向東家看芍藥愁來簫鼓不堪聽

三月廿三日南門訪柯逸人及還遇張與權偕
過建初佛舍觀畫題詩之際與權出舊紙索詩
為書五十六字

南郭春晴穀雨餘為尋山客過郊居畱侯孫子歸途遇
佛氏園林與世疎頻見赤松清夢裏同遊寶地綠陰初
老夫已悟人間事爾祖丹經願起予

三月廿七夜與諸友宿孫尚質書舍

白頭病叟歸鄉里杖履清遊及暮春連夜城南隨處宿
五更燈下有誰嗔穿花送茗呼童子隔屋聞雞報主人
莫怪閒情太真率去年辛苦在風塵

與諸友宿城南卽事

吾邑東門外五里許有岱嶽行祠在小黃山
俗傳三月廿七夜其神出而還恒有火光若
列炬自諸叢祠出送嶽神還明滅聚散雲霧

間不可勝數者是其徵也每歲邑人候而觀之以為常今年其夕周原信孫尚質范德梓郭廷羽趙自立張與權陳子範輩要予宿南門外初不知觀所謂神燈者因賦詩一首以寓感慨之意云

同宿城南有八人送春箇箇惜殘春空中何物明燈燭夜半高歌動鬼神白雪滿頭猶激烈縑塵在眼復酸辛年華不及諸郎好作賦吟詩齒髮新

四月廿九夜宿楊氏嘉樹軒

前月城南連夜宿今宵水北對花眠
梅天未食楊家果夜雨都耕舜水田
惡客不來成好夢大兵已過重豐年
酒醒得句呼燈燭一丈紅葵在榻前

留飲汪尚志成趣軒

城東門外步晴暉柳絮無情作雪飛
好客兒郎留午宴看花今日送春歸
霓裳自愛荼蘼好雲錦誰憐芍藥稀
念爾通家今再世歲時歡會莫相違

松雲軒

幽人屋前多古松
松上白雲知幾重
蒼蒼寒色經年在
漠漠春陰盡日封
子規啼月許同宿
神龍作雨能相從
丈夫出處亦如此
山澤巢居恐未容

題張立中負米詩卷

竹山渡東葉處士為我曾談張立中
負米只期慈母飽
還家不泣暮途窮
太倉黠鼠無饑歲
老樹啼烏有烈風
薄俗驚心那可說
長歌在耳慰衰翁

題沈鍊師樵雲卷

白雲可只自怡悅此語曾聞陶隱居有客樵雲吾未解
通宵煮石豈成虛神仙對奕看何厭富貴忘情樂有餘
應念當時賣薪者暮年勤苦讀何書

五月十日楊灌園留飲後清漁舍且用梅字韵
見教予亦用韵酬之

長懷載酒為君來夢裏寒花一夜開識字可期天祿閣
吐詞何望廣平梅田園歸處松三徑詩賦生涯水一杯

白首追從頻有約今朝又為掃蒼苔

五月十日訪楊灌園于後清漁舍而唐景顏澄
了然先生留飲至晚與了然還及汪尚志之門
遇雨見留甚勤又置酒臨昏而散乃用向所留
題韻紀其事

梅天疎雨灑斜暉水北平田白鷺飛飲酒偶同諸客醉
吟詩相伴一僧歸茅堂會合誰知好蓮社交遊更覺稀
暝色苦催花底散南隣留客意難違

方氏山意樓

山意衝寒欲放梅，杜陵詩句為誰裁。
南山種樹人猶在，東閣看花客再來。
風煖小春能自耐，雪深殘臘未須開。
早年訪舊曾同宿，白髮題詩愧不才。

五月廿八日為梅川羅翁題會稽俞景山山水圖

關情俞老廿餘年，忽見畫圖東海邊。
閱世兵戈成死別，銷愁山水覺渠賢。
登高昔有穿雲屐，訪舊今無泛雪船。

索我題詩羅處士
卷簾梅雨落梅川

贈杖錫寺安大愚長老

四明山中仙佛居
世界自與凡人踈
藤蘿諸天映微月
樓閣孤禪棲太虛
金錫何年留寶地
石窗有客寄丹書
生平欲往已衰老
路遠安得乘籃輿

留贈郭思賢

去年已酉夏
余有龍河之行
以衰疾留滯錢
唐十餘日
寓所與郭子思賢氏相近
間與語

若舊相識然其家世業婦人醫由汴徙錢唐
已及三百年而其名不替以趙郭氏稱于遠
近者是今年七月予以考藝適閩道經錢唐
復與思賢會迺為賦詩一首蓋塞其去年之
請也

種樹曾聞郭橐駝錢唐趙郭業如何名家汴水逾三世
治疾邯鄲擅一科舊歲客居頻晤語新秋藥室再經過
暮年遠向三山去歸對黃花為醉歌

過釣臺

先生昔自吾鄉來愛此桐江雙石臺
石臺萬古端有待
羊裘一出能復迴
在越丘園成感慨
入閩舟楫為徘徊
豈知陵谷推遷後
過客暮年青眼開

大浪灘

大浪灘頭大雨來
樓船不放四窗開
低流江水來如箭
直下山泉響似雷
豈怕晚涼行李濕
只愁秋熱簡書催
白頭涉險緣何事
考藝南閩愧俊才